

فريق التفريغ بموقع الطريق إلى الله
يقدم

احترس إنه سلفي (Salaphopia - سلفوبيا) - من سلسلة "على فين يا مصر" (باللهجة المصرية)

لفضيلة الشيخ : الدكتور : حازم شومان

رابط المادة : <http://www.way2allah.com/modules.php?name=Khotab&op=Details&khid=40903>



الحمد لله وكفى ، وصلاة وسلاماً على عباده الذين اصطفى... اللهم لك الحمد كله ولك الملك كله وبيدك الخير كله وإليك يرجع الأمر كله ، ليك يا ربنا ويا مولانا وسعديك ، والخير كل الخير في يدك ، والشر ليس إليك ، إنا بك وإليك ، تباركت وتعاليت ، أستغفرك وأتوب إليك ، اللهم صلي على حبيب قلوبنا وعلى طيب قلوبنا وعلى شفيعنا يوم العرض عليك محمد صلى الله عليه وسلم ، في الأولين والآخرين والملائ الأعلی إلى يوم الدين أما بعد ،،،

أجيال ورا أجيال... ثابتين على نهجنا

واللي في وش الدين... يا ويله من ربنا

جائز يكون إبليس... ناشر ظلامه إنما

تقدر شريعة الله... ترفعنا أبعد سما

ده حلمنا طول عمرنا... شرع ربنا... يحكمنا كلنا... كلنا

أعظم حلم

الكبير والصغير وكل واحد وكل واحدة على أرض مصر يحلموا بيه "اليوم اللي مصرنا تتحكم فيه بشرع ربنا" أغلى حلم في قلبي ليكي يا مصر ، اليوم اللي هتتحكمي فيه بشرع الله سبحانه وتعالى ، أغلى حلم في قلبي للوطن ، اللي أغلى وطن على وجه الأرض في قلبي ، بعد بيت الله الحرام ومدينة رسول الله صلى الله عليه وسلم ، "اليوم اللي يتحكم فيه بشرع الله"

إفتراءات على السلفيين !

إخواني في الله ، صحي الشعب المصري في الأيام اللي فاتت ، على حملة إعلامية مهولة تجاه "كائنات" كإن الناس أول مرة تسمع عنها ، اسمهم "السلفيين" ، كل شوية الحقوا ، إيه؟! الكائنات اللي اسمهم "السلفيين" يبحرقوا في الأضرحة والمقامات ! ويملوا في نفسهم وطالعين على مقام سيدنا الحسين ، سيدنا الحسين أصلاً يا جماعة مش مدفون في مصر ، أصله قتل في العراق ، رضي الله عنه ، فإزاي هيبقى مدفون في مصر؟! شويه.. الحقوا ، الكائنات اللي اسمهم "السلفيين" ، عملوا إيه تاني؟! جايين مية نار وهينزلوا على وش كل واحدة مش منقبة ، طب نهرب منهم فين؟! شوية... الحقوا ، إيه؟! الكائنات اللي اسمهم "السلفيين" قرروا يبقوا حد

قطع الودان على كل واحد في الشعب المصري ! هو فيه حد أصلاً اسمه قطع الودان ؟! وأخيراً يا جماعة... آخر حاجه طلعت... إن السلفيين هم اللي كسروا مناخير أبو الهول !

الله أكبر.. يا سلفيين ، يا سلفيين مية نار وقلنا ماشي ، قطاعات ودان وقلنا ماشي ، كمان مناخير أبو الهول ! طلوعوا مناخير أبو الهول ! إحنا لازم نقدم اعتذار لأبو الهول ! أحسن أنعمل علينا حملة في الفيسبوك يا جماعة ، الولد اللي والدته بتحبه بتقول له كل يوم الصبح : روح يا أبني رينا يجعلك في كل صفحة فيسبوك سلامة ناقص يقولوا إن ظهور السلفيين من علامات الساعة الكبرى ! ناقص يقولوا إن السلفيين سبب نكسة ٦٧ ، وسبب زلزال القاهرة ، وسبب زلزال اليابان... كل قضية دلوقتي بتقيد الآن ضد سلفي ، المتهم الآن سلفي حتى تثبت براءته ، ليه كدة ؟! ليه عاوزين يفتلوا بيننا وبين الناس ؟! ليه عاوزين يعملوا جدار بيننا وبينكم ؟! ليه عاوزين يخوفوكوا منّا ؟! ليه عاوزينكم متسمعوناش ؟! ليه يا جماعة ؟!

فوبيا السلفيين "سلفوبيا"

وكانت النتيجة... زي في الغرب لما اليهود حبوا يعملوا جدار ما بين الإسلام وبين الناس ، رعبوا الناس من الإسلام لحد ما طلوعوا مرض اسمه "إسلاموفوبيا" فوبيا الإسلام ، الرعب من الإسلام... العلمانيين طلوعوا مرض في مصر اسمه "سلف فوبيا" فوبيا السلفيين ، الرعب من السلفيين ، وإحنا في عصر السرعة دلوقتي يا إخواني ، فإحنا هنخليها "سلفوبيا"... مرض السلفوبيا الجديد ! اللي العلمانيين قاعدين يزرعوا فيه ليل نهار ، والإشاعات بدأت تغذيه !

انتوا فاكرين هيلاري كلنتون نزلت مصر ليه ؟! دي نزلت علشان تتفاوض مع السلفيين في السر ، وصلنا يا جماعة لهيلاري كلنتون ! إنتوا فاكرين السلفيين دول كانوا رجالة الحكومة ، رجالة الحكومة ! سبحان الله ، يا أخي عيني في عينك كدة ! إمال كل المعتقلات وكل التعذيب ده كان علشان مين ؟! لو واحد قال له كدة ، يقوله : لا ده أنت منتاش فاهم ، ده مكش تعذيب ، إمال إيه ؟! ده كانوا بيروحوا ياخدوا جلسات كهربا على حساب الحكومة ! سبحان الله يا إخواني ! سبحان الله... السلفوبيا... الناس أصبحت خايفه ، إيه المنقبة دي ! إيه الملتحي ده ! الناس قعدت قلقانة

الرد على الإفتراءات

وكانت المفاجأة ، بعد التحقيقات إن مية النار لا فيه مية نار ولا مية ورد ولا فيه أي مية ! إن حرق الأضرحة ، ماس كهربائي حصل في ضريح ، ما فيش حد له علاقة بيه ، والأضرحة الثانية لا لقوا فيها ميتين أصلاً ، ولا لقوا متهمين ، ولا لقوا هدم ، ولا لقوا أي حاجة !

طب وقطع الودان ؟! قطع الودان واحد في الصعيد متهم في قضية بغاء ، والناس مسلمين وغير مسلمين قاموا عليه ، في ضمن التسجيلات واحد سمع واحد يقول لواحد : "يا شيخ حسني" ، بس ! سابوا البغاء وسابوا الفتيات وسابوا الشقق وسابوا المتهمين وسابوا الناس ومسكوا في السلفيين !

اتقوا الله يا علمانيين

مين السلفيين دول ؟!

احتبس إنه سلفي (Salaphopia - سلفوبيا) - من سلسلة "على فين يا مصر"

أنتوا يا جماعة أول مرة تعرفونا؟! أنتوا بتصدقوا عن "دعاة السنة" اللي بيتقال؟! طول عمرنا في شارع شارع ، ومدينة مدينة طول عمرنا... الفرق إنه حصل انفتاح ، فبدل ما كان مساجد صغيرة ، فبقت أماكن في كل مكان ، أول مرة تعرفونا؟! بتسمعوا عن دين جي من المريخ؟! بتسمعوا عن ناس عايشه من عطارد؟!!

المعنى اللغوي لكلمة "سلفية"

طب إيه هي السلفية؟! يا إخوانا أنا عاوزكم تسمعوني ، يا جماعة مفيش حد ناجح على وجه الأرض إلا سلفي ، إيه يا عم الكلام الغريب اللي أنت بتقوله ده ! مفيش حد ناجح على وجه الأرض إلا سلفي !! إزاي؟! يا إخوانا... لو الطب اتشال منه ويليام هارفي ، واتشال منه لويس باستير ، كان حد من الطب دلوقتي عرف ياخد نوبل؟! لا يمكن ، ده دول سلف الطب ، لا يمكن يبقى ذكاترة الطب إلا سلفيين... دكتور أحمد زويل سلفي ، إزاي الكلام ده؟! سلفي في الفيزياء ، هو كان ممكن يوصل "للفيمتو (سكند) ثانية" من غير أينشتاين ومن غير نيوتن ومن غير علماء الفيزياء الأوائل ، لا يمكن دا دول السلف بتوع الفيزياء.. محدش نجح على وجه الأرض إلا سلفي... فرنسا سلفية في السياسة ، إزاي؟! جان جاك روسو والكتب بتاعته ، ومنتسكي والكتب بتاعته اللي مكوته فكر فرنسا من ربعمية سنة لحد دلوقتي ماشيين عليها ، مقلوش هنرجع لأيام الناقة تاني ... إيه الكلام اللي من ربعمية سنة

لا لقطعنا عن جذورنا

يا إخوانا.. محدش بينجح غير اللي مبيتقطعش عن جذوره ، عاوزين يقطعوكوا ليه يا مسلمين عن جذوركم؟! السلفية تعني العودة إلى الجذور ، السلفية يعني فهم الإسلام بفهم أبو بكر وعمر ، وابن مسعود وابن عمر وابن عباس والإمام الشافعي وأبو حنيفة ، ومالك وأحمد ابن حنبل

يا علماء الأرض.. أنتوا تقبلوا بعد ألف سنة ، بعد ألف سنة هتكون الدنيا تطورت ، إن ربنا أقامها يعني وأحيها ، هتكون تطورت في كل حاجه عن كدة ، كلامكوا دلوقتي هيبقى بسيط قوي بالنسبة لبعده ألف سنة ، تقبلوا يقولوا عليكموا كنتم رجعيين وتخلف إن إحنا نسمع كلام دول ، ولا إنهم يحترموكوا؟! انتوا ليه تنسوا الناس العظماء ، ده الكلام ده في الدنيا ، فما بالكوا في الدين بقى ! فما بالكوا في الدين يا جماعة؟!!

عاوزين يقطعونا عن جذورنا علشان نموت ! إحنا عاوزين نطلع لقدام بس منفصلش عن جذورنا ابدًا... السلفية يعني إيه؟! يعني كلمة الإمام مالك: "لن تصلح آخر هذه الأمة - اللي هو إحنا - إلا بما صلح به أولها" ... يا جماعة هي دي السلفية

السلفوبيا العجيبة !

السلفوبيا اللي نشرناها في المجتمع المصري دلوقتي... سلفوبيا في غاية العجب والغرابة ! سلفوبيا مرعبة ! ولد واقف مع بنت ، فشاب رايع يكلمه يوعظه ، الولد بدأ يرتعش ويرتجف ، قال له: يا ابني أنا لا معايا مية نار ولا معايا مقص هقطع بيه ودنك ! الولد قعد يضحك

في ناس دلوقتي بقى متهيا لها إن إحنا مخبيين مقصات مقاسات مختلفة في جيوبنا ، علشان كل واحد يبقى فيه مقص على مقاس ودانه ! مقاسات الودان كلها عندنا ! محدش له حجه ! ومتهيا لهم أن إحنا عاملين خدمة محمول إسمها "أخطفني شكرًا" اللي عايز خطف يضرب رقم ١ ، اللي عايز مية نار يضغط رقم ٢ ، اللي عايز تقطيع ودان

رقم ٣ ، أي موتة نفسك فيها عندنا... فيه ناس متهيأ لها إن إحنا هنغير في رسايل المحمول ، بدل أدفع لي شكرًا ، هتبقى ادفع لي بالله عليك... وبدل سلفني شكرًا ، هتبقى سلفني جزاك الله خيرًا

اتقوا الظلم !

الناس متهيأ لها إن إحنا اللي هننزل الانتخابات بالملتزمين ، والناس هترشحنا ، والبلد دي هنعمل "دسكونت" تخفيض على تقطيع الودان فيها ، خلاص هنقلل عدد تقطيع الودان فيها ! إيه يا إخوانا ده !
يا أيها العلمانيون "اتقوا الظلم ، فإن الظلم ظلمات يوم القيامة" رواه مسلم ظلمات يوم القيامة اللي خمسين ألف سنة ، من أيام العباسيين والأمويين لحد دلوقتي مجتش ألفين سنة ، من أيام سيدنا آدم ما نزل على الأرض لحد دلوقتي مجتش عشر آلاف سنة ، يا إخوانا خمسين ألف سنة هنتحاسب كلنا فيها بين إيدينا ربنا

التصور الخاطئ عن الدين

الناس واخدة صورة غريبة ، السلفوييا بقت موجودة عند ناس كتيرة الأيام دي ، صور غريبة عن الملتزمين ، عن المنقبات... شاب من الشباب عاوز يتجوز ، فواحد بيقول له: فلانه منقبة ، فقال له: منقبة ! لأ يا عم ، علشان تقول لي: قم أقعد ! قم أقعد ؟! يا عم أنتوا واخدين فكرة عن ناس جاية من المريخ يا إخوانا ، يعني الشاب خايف يقولك: يا عم أروح أتجوز واحدة منقبة ، أقولها: بحبك ، تقول لي: جزاك الله خيرًا يا أخي ! مهماش عارفين الموضوع ماشي إزاي !

النظرة الخاطئة عن الشيء بتضيع يا إخوانا ، يعني لو واحد مثلاً ، قلت له: إيه رأيك في كلية طب ؟! ياااه كلية طب دي جميلة وحاجه عظيمة وإنسانية.. تعالى أسأل واحد دخل كلية طب واتبهدل في كلية طب ، واسأله...يقولك : مش عارف مين اللي زقني ، يا رتني كنت عارف اللي فيها قبل ما أدخلها !

يا إخوانا النظرة... زي الشاب اللي هيموت على الجواز ، مهواش عارف فيه إيه في الجواز ، نظرتة الغلط دي ممكن تضيع حياته ، ممكن تنكد عليه ، أحد الناس في السلف زمان اتجوز واحدة من غير ما يعرف دي مين ودي إيه ؟! فطلعت فظيعة ! جيرانه كل يوم يسمعون خبط ورزع وشباب ! يقولوا له : طلقها ، يقول لهم : أبدًا لا يمكن ، ثاني يوم ، خبط ورزع وشباب ومطرود من البيت ، طلقها ! لا يمكن ، قالوا له : ليه ؟! قال لهم : أخشى أن أطلقها فيتزوجها غيري فيفتن في دينه ، فمرت الأيام وأختنا ماتت ، فوهم خارجين بيها من البيت ، قال لهم: أستنوا ، قالوا له: إيه ! قال: اللهم إني أشهدك أنها طالق طالق طالق ، قالوا له: يا عم أنت طول عمرك مستحملها ومش راضي تطلقها ، والنهاردة بعد ما ماتت جيت تطلقها ، قال لهم: أخشى أن تحشر معي في الجنة ، يعني التصور الخاطئ عن قضية زي الجواز بسيطة ، ممكن تضيع عمر واحد زي صاحبنا ده هو

إمال التصور الخاطئ عن الدين ! عن طريق النجاة الوحيد ! عن طوق النجاة الوحيد اللي هو السنة ! بيشوهوا صورة دعاة السنة في قلوبكم ليه ؟! ليه بيشوهوا صورة الالتزام والدين وحياة الدين في قلوبكم يا جماعة ؟!

طب ليه كلمة "سلفي" ؟!

زي كلمة قاهري مش معناها مصري ؟! مصري بس عايش في القاهرة.. طب ليه كلمة "سلفي وإخوان" والكلام اللي إنتم بتقولوه بتاعكم ده ؟! يا جماعة دي عاملة زي المهاجرين والأنصار كدة ، ألفاظ شرفية ، واللي غزى الألفاظ

دي أساساً ناس أنتوا عارفينها كانت عاوزه تفرق ما بيننا وبين بعض ، عاوزه تولع الخلافات ما بيننا وبين بعض ، إنما ربنا يقول: " **هُوَ سَمَّاكُمُ الْمُسْلِمِينَ** " الحج: ٧٨ كلنا اسمنا المسلمين ، يا جماعة والإخوان على راسنا من فوق ، والسلفيين على راس الإخوان ، والدين ده مش دين السلفيين ولا دين الإخوان ، الدين ده دين كل مسلم موحد بالله سبحانه وتعالى

يريدون أن يمزقوا الأمة

طيب إمال اللي بيتكلموا عليكم دول بيتكلموا عليكم ليه؟! ملهمش مصلحة؟! عاوزين يمزقوا الأمة ، جلا دستون لما وقف في بريطانيا وقال: "لن نسيطر على الأمة الإسلامية إلا إذا هدمنا عندهم القرآن وصلاة الجمعة والكعبة" ليه؟! الثلاث حاجات اللي بتلما وتربطنا ، ققام واحد أتحمس وسخن وراح ماسك المصحف بيقطعه ، قال له : "ليس هكذا يا غافل ، بل ندع القرآن في كل بيت من بيوتهم ، ولكن نمزق القرآن في قلوبهم" آه ده اللي فاهم ، يخلي القرآن بركة !

تبقى البنت ماشيه لابس تيج صاخر ، ولا بسة "ما شاء الله" ! قرآن بركة ! يبقى الشاب ماشي بالعريية مشغل طقم صوت بعشر آلاف جنية ، مشغل ألبوم ودنيته كلها لاهيه عن ذكر ربنا ، والمصحف فوق الكاسيت بركة ! يبقى الراجل مكش بيصلي ولا بيركعها ويموت ، يوقفوا واحد على قبره يقرأ: " **مَا سَلَكَكُمْ فِي سَقَرٍ * قَالُوا لَمْ نَلِكْ مِنْ الْفُصَلِينَ** " المدثر ٤٢ : ٤٣ بركة ! ويمكن الملائكة جوه القبر بتقيم الحجة عليه بالآيات ، يبقى المصحف بركة !

لكل قاعدة شواذ

طب ما في سلفيين وحشين... تنكروا؟! تنكروا إن في سلفيين وحشين؟! آه في سلفيين وحشين ، أيوه ، ولكن دلوقتي المصريين مش هم اللي عملوا الثورة والدنيا كلها مبهورة بيهم؟! آه ، طب واللي عملوا "واقعة الجمل" جنسيتهم إيه؟! مصريين ، يبقى مصر كلها وحشة ! لا يمكن ، مش فيه مسلمين بيعاربوا الإسلام أكثر من أعداء الإسلام؟! آه ، يبقى الإسلام كله وحش ! لا يمكن ، لو أكبر شيخ في الدنيا سرق ، يبقى الإسلام دين سرقة !

محدث حجة على الدين يا جماعة

يا إخوانا لو دكتور غلط نفقل كلية الطب؟! أيوه فيه أخطاء فردية ، إنما ده الشذوذ مش القاعدة يا جماعة.. إنما السلفيه دي ، آه لو تعرفها ، يا إخوانا اسمعوا منا ... لا تسمعوا عنا ، إحنا مش ناس جايين من المريخ وأول مرة تشوفونا ، إحنا ناس عايشين وسطكم بندعوا إلى السنة ، مسلمين موحدين مؤمنين بالله ، نفسنا إن السنة تبقى طوق النجاة لينا كلنا في الوصول إلى ربنا سبحانه وتعالى

السلفيون والعلمانيون

عارفين السلفيين والعلمانيين عاملين زي إيه؟! زي مستشفى مجانيين ، لو أنت مثلاً في مستشفى مجانيين كزائر طبعا ، وقام فيها حريقه ، كل الدكاترة والممرضات اللي لابسين أبيض خرجوا من باب ، وكل المجانيين اللي لابسين أي حاجه خرجوا من باب ثاني ، تجري ورا مين؟! ورا إيه؟! إحنا جرينا ورا النبي صلى الله عليه وسلم ، وورا الصحابة... هما السلفيين اللي في كل حريقه بيعجروا ورا النبي وورا الصحابة ، علشان الأمة تنجوا وعشان هم ينجوا يا جماعة

الفرق ما بين شريعة الإسلام وأي شريعة ثانية ، زي شلن بس بيلمع قوي ، ومتلمع قوي ، وشيك بمليار جنيه ، ورقة عادية ، شيك بمليار جنيه... فالناس خاطفها اللمة بتاعة الشلن ومش خاطفها منظر الشيك أبو مليار ، الشرائع الغربية دي شلن بس ملمعينه بالإعلام بتاعهم ، إنما شريعتنا دي الشيك أبو مليار وأعلى كمان يا أخواني ، يا جماعة عاوزين نعرف إيه هو ديننا ؟! إيه هي عظمة ديننا ؟!

أين كان السلفيون ؟!

طب استنوا استنوا استنوا بقى ! هيطلع واحد علماني منه فيه بقى ! ويقول لك: استنى يا عم ، تعالى يا عم السلفي ، يعني أنتوا السلفيين ! طب أنتوا كنتم فين ! كنتوا فين في الثورة مشفناكوش ؟! مشفتناش بجد ؟! وكنتوا فين قبل الثورة أيام الظلم ؟! مسمعتوش صوتنا خالص ؟! وكنتوا فين وفجأة ظهرتوا في كل حطة ؟! إيه اللي حصل بقى ! لأ ردوا لنا على دي بقى ؟! متهيأله إنه جبهنا بالضربة القاضية

إحنا كنا أكبر هولوكوست في العالم كله ، إحنا أكبر محرقة تعذيب كانت بتتم للتيار الإسلامي في العالم كله ، إحنا كان كل يوم بيتعمل سجن جديد علشان الملتزمين ، بل والملتزمات ، لو قعدنا نقول القصص اللي كانت بتحصل ، والله هنفقت أكباد الناس ، نازله في كتب ورا كتب ورا كتب ، للي عاوز يشتريها ، وإن جت فرصة ثانية نقولها ، إحنا كنا أكبر قضية ظلم في مصر !

ومع ذلك كان دعاة السلفية ودعاة السنة ودعاة الإسلام كانوا مليون الدنيا دعوة ، رغم التهديدات اللي هم فيها ، مدينة مدينة وحارة حارة ، مش عاوز أقول : وزنجة زنجة ، كانوا مليون الدنيا دعوة... كانوا فين ؟! كانوا ماليين الدنيا حمل لهموم الإسلام ، مين اللي كان شايل قضية غزة غير دعاة الإسلام ! مين اللي شال قضية ليبيا واللاجئين دلوقتي ! مين اللي كان شايل قضية جنوب السودان ! مين اللي كان شايل قضايا الأمة كلها !

أين كنتم يا دعاة العلمانية ؟

أنا عاوز أقلب الطريزة بقى وأقول لكم : يا دعاة العلمانية انتوا اللي كنتم فين ؟! انتوا اللي كنتم فين ؟! كان معاكم الجرائد والقنوات ، والمجلات والمواقع الإخبارية ، والمدونات وبرامج التوك شو والجرايد الكبيرة ، كنتم فين إنتم ؟! كنتم فين ؟!

إنتم دلوقتي جاين تتكلموا علينا ! ولما كنا أكبر قضية ظلم محدش دافع عننا ! محدش وقف معانا منكم ! دلوقتي المنابر الإعلامية اللي مسخرنها ضدنا ، مسخرتوهاش ليه لدفع الظلم ؟! كل ظلم وقفنوا ضده ، إلا الظلم اللي كان علينا ، كل حرية نديتوا بيها إلا حرية الدين وحرية الدعوة إلى الله ، إشمعنا ؟! إشمعنا الموقف ده وخدينه من دين ربنا ؟! إشمعني يا جماعة ؟!

العلمانية والخوف من الشريعة

هيقولك : لا لا لا لا بص بقى ، بصراحة بقى إنتم عاوزين تطبقوا الشريعة الإسلامية - دي المشكلة بتاعتكم ! الشريعة الإسلامية ! - يا نهار أبيض ، يعني هتقطعوا إدينا ورجلينا ورقابيننا ونستورد أطراف صناعية من بره ! يا نهار أبيض ، ونستورد جلابيب وسبح ! ونستورد ناقة علشان كل واحد هيركب الناقة تاني ! ونقفل البنوك ! ونطرد

السياح ! وممنوع المعارضة لأن اللي بيعارض هيبقى بيعارض الدين والشرع ! يبقى حرام المعارضة ! وهتخربوا الإقتصاد ! وهتدخلونا في حرب مع اليهود ، وإحنا لسه مش مستعدين لها !
ياااه ده اللي انتوا بتعلموه للناس ؟! ده اللي انتو بتخوفوا الناس منه في الإسلامفويا اللي أنتوا بتزرعوها بإيديكوا وسط المسلمين ! بتخوفوهم من شريعة الله ! أكبر جريمة إني انا أبقي بحبك أوي أوي ، وجايب لك طبق أكل وأنت بتموت من الجوع ، وجاي أقدمهولك وأقولك : اتفضل ، تقول لي : إيه ده ؟! أنا خايف إن الطبق ده يبقى فيه سم ! أنا اللي هسمك ؟! العلمانيين يقولوا لربنا : خايفين شريعتك يبقى فيها سم ، خايفين شريعتك تضيعنا !
السيدة هاجر بتقول : "الله أمرك بهذا ؟! إذاً فلن يضيعنا" ... العلمانيين يقولوا : يا رب خايفين أوامرك تضيعنا ، خايفين توجيهاتك تضيعنا ، خايفين إن شريعتك تبقى معدتش تنفع ، كان من ١٤٠٠ سنة تنفع ، إنما دلوقتي ! هو ربنا كان من ١٤٠٠ سنة يعلم اللي هحصل بعد ١٤٠٠ سنة ؟! إيه اللي أنتوا بتقولوه ده ؟! إنتم بتقولوا إيه ؟! إنتم عارفين اللي أنتوا بتقولوه ولا لأ !

إن الحكم إلا لله

"إِنَّ الْحُكْمَ إِلَّا لِلَّهِ" الأنعام: ٥٧ ... هم يقولوا : الحكم لأي حد إلا لله.. يااه ، قلبك اللي بينبض في اليوم مية ألف نبضة يقدر يخرج عن حكم ربنا ؟! رئتك اللي بتتنفس كل يوم ٢٨٠٠٠ مرة تقدر تخرج عن حكم ربنا ؟! كبذك اللي بيأدي خمسميت وظيفة كل ثانية يقدر يخرج عن حكم ربنا ؟! مخك اللي عدد الاتصالات ما بين خلاليه أعظم من عدد الاتصالات بين قارات الأرض الستة في الثانية الواحدة يقدر يخرج عن حكم ربنا ؟! كليتك اللي بتغسل دمك ١٦ مرة كل يوم وأنت مش حاسس تقدر يخرج عن حكم ربنا ؟!

أفحكم الجاهلية يبغون !

إنتم بتقولوا لربنا : أي حد يتكلم في الاقتصاد إلا ربنا ! أي حد يتكلم في السياسة إلا ربنا ! أي حد يتكلم في الدنيا إلا ربنا ! إنتم عارفين إنتم بتقولوا إيه ؟! إنتم عارفين الكلام بتاعكم ده معناه إيه ! عاوزين تعملوا إقامة جبرية للدين في الجامع ، عاوزين يدوا للإسلام إعدام سياسي ، يصدروا إعدام سياسي للإسلام !
حكم ربنا مينفعش ليه ؟! يقولك : أنا مقدرش أقول لربنا أنت ديكتاتور - استغفر الله العظيم - طب ما أنت قلتها ، هو أنا لو قلت لك : اوعى تزورني ، تقولي ليه ؟! أصلك لو زرتني هتتفرز واطردك ، طب ما أنا طردتك خلاص ! إنتم بتقولوا لربنا إيه ! عاوزين تلغوا من الحياة "قال الله" ! عاوزين تلغوا من الحياة "قال رسول الله صلى الله عليه وسلم" ليه ؟! أصل أوروبا عملوا كدة وإحنا بنعمل زيهم ! إنا على آثارهم مقتدون !

"وَكَذَلِكَ مَا أَرْسَلْنَا مِنْ قَبْلِكَ فِي قَرْيَةٍ مِنْ نَذِيرٍ إِلَّا قَالَ مُتْرَفُوهَا إِنَّا وَجَدْنَا آبَاءَنَا عَلَىٰ أُمَّةٍ وَإِنَّا عَلَىٰ آثَارِهِمْ مُقْتَدُونَ" الزخرف: ٢٣ طب أوروبا حرقوا العلماء ، حرقوا جاليليو ، من أول كلام في الكتب المحرفة عندهم أخطاء علمية ، إنتم مالكو... إنتم مالكو بهذا الأمر ، إحنا مالنا يا جماعة ؟! أضعف عصورهم العصور اللي طبقوا فيها - مش دينهم - الدين المحرف ، إحنا أقوى عصورنا العصور اللي طبقنا فيها ديننا

إحنا مالنا نتأثر ليه ؟! نقلدهم ليه ؟! إحنا مش محتاجين هذا الكلام اللي عندهم... ربنا يقول: "أَفْحَكُمُ الْجَاهِلِيَّةُ يَبْغُونَ" المائدة: ٥٠ الحكم اللي فيه ينفع اثنين شواذ يتجاوزوا بعض في بعض القوانين الأوروبية ! ويقضوا شهر

العسل في أي مكان ! الحكم اللي فيه أي امرأة مع أي رجل ما دام على خارج فراش الزوجية لا يصبح زنا ولا تصبح جريمة ! هذه الشرائع !

"وَأَن اخْكُم بَيْنَهُم بِمَا أَنزَلَ اللَّهُ وَلَا تَتَّبِعْ أَهْوَاءَهُمْ وَاحْذَرْهُمْ أَنْ يَفْتِنُوكَ عَنْ بَعْضِ مَا أَنزَلَ اللَّهُ إِلَيْكَ فَإِنْ تَوَلَّوْا فَاعْلَمُوا أَنَّمَا يُرِيدُ اللَّهُ أَنْ يُصَيِّبَهُمْ بِبَعْضِ ذُنُوبِهِمْ وَإِنَّ كَثِيرًا مِنَ النَّاسِ لَفَاسِقُونَ * أَفَحُكْمَ الْجَاهِلِيَّةِ يَبْغُونَ وَمَنْ أَحْسَنُ مِنَ اللَّهِ حُكْمًا لِقَوْمٍ يُوقِنُونَ" المائدة ٤٩ : ٥٠ "فَلَا وَرَبِّكَ لَا يُؤْمِنُونَ حَتَّى يُحَكِّمُوكَ فِيمَا شَجَرَ بَيْنَهُمْ" النساء: ٦٥ دي

قضايا عقيدة يا إخوانا

من شبهات العلمانية : الإسلام والحرية

ويقول لك : أصل الشريعة بتاعتكم مش متسامحة ! إحنا اللي مش متسامحين ؟! لما قلت إن المذاهب العلمانية معناها إن هيقلعوا الستات الحجاب... قالوا : لا لا مين اللي قال الكلام ده ! ده إحنا بتوع الحرية ! والله ؟! بتوع الحرية ؟! إمال علمانية تركيا لما واحدة كسبت في الانتخابات البرلمانية قوموا الدنيا حريقة علشان متدخلش برجلها ليه ! وعلمانية فرنسا ، العقد الاجتماعي بتاع جان جاك روسو ، اللي بيسموه نبي الثورة الفرنسية ، وروح القوانين بتاع مونتسكيو ، والكلام العظيم بتاعهم ده كله ، فرنسا منعت دخول بنت محجبة مدارسها ! يبقى إحنا اللي مش متسامحين ؟! علمانية تونس جنبنا أهو ، كان البوليس يقبض على اللي بتليس إيشارب على راسها ! يبقى إحنا اللي مش متسامحين ؟! إحنا اللي بنتهم الناس وخلاص ؟!

يا جماعة... يا إخوانا "أَنْتُمْ أَعْلَمُ أَمِ اللَّهُ" البقرة: ١٤٠ لو واحد اخترع التلفزيون وعمل الكتالوج بتاعه ، وإداه لواحد ، قام بص في الكتالوج وقال له: لا لا أنا عندي اعتراضات على الكلام اللي في الكتالوج ده... كل الناس هتقول عليه أيه؟! مجنون ، أنت جاي تعدل على اللي صنع !

"أَلَا يَعْلَمُ مَنْ خَلَقَ" الملك: ١٤ .. ده ربنا هو اللي خلق الإنسان ، أنت جاي تعدل على كتالوج صلاح البشرية "الشريعة الإسلامية" من اللي خلق البشرية ؟! إيه الكلام ده يا جماعة ؟! إحنا فين يا إخوانا ! ده قصص الأطفال مينفعش يتعمل فيها الكلام ده ! ... "أَنْتُمْ أَعْلَمُ أَمِ اللَّهُ" مونتسكي وديكارت وبرنارد شو أعلم أم الله ؟! جيمس جيمس أعلم أم الله ؟! وجورج واشنطن أعلم أم الله ؟!

العلمانية وعزل الدين عن الحياة

يا إخوانا.. إحنا فين ثقتنا في ربنا وفي شرع ربنا سبحانه وتعالى ! يقولك: الإقتصاد الدين ملوش دعوة بيه ! طب والسياسة ؟! لا لا الدين ملوش دعوة بيه ، طب والمعاملات الاجتماعية ؟! لا لا الدين ملوش دعوة بيه ، طب إمال الدين له دعوة بإيه ؟! إمال الدين بتاع إيه ؟! إمال الدين وظيفته إيه ؟! متتكلموش غير في الجنة والنار بس ! ولو أتكلمنا فيهم يقولوا إرهابيين ومتطرفين !

طب نعمل إيه ؟! طب نروح فين ؟! يعني إحنا وظيفتنا في الحياه إيه ؟! بتوع الدين دول بقى يقفلوا بقهم خالص خالص ! ياااه ، وكانت النتيجة وكانت الثمرة - مع أن أطول نهر في العالم في مصر - مفيش كباية ميه نظيفة ، نص شواطئ مصر ! وبعض المزارع السمكية بيرمولها الحمير المتجيفة علشان تاكلها ! شايفين يا إخوانا لما الدين

غاب ، لما الشريعة غابت ، مصر رقم ٨١ في الاقتصاد في العالم بعد دول في أفريقيا لو سمعت اسمها تتقهر ، مصر في ذيل العالم كله

طب واللي طبقوا الإسلام؟! تركيا اللي طبقت ١٠% من الشريعة الإسلامية بقت رقم ١٦ اقتصاديًا على العالم ، كانت رقم ٦١ ، رقم ١٦ اقتصاديًا على العالم ، لما طبقت ١٠% إمال لو طبقنا الشريعة الإسلامية كلها ! السعودية رقم ١١ في الاقتصاد والاستثمار والصناعة ، رقم ١١ على العالم ، والتطبيق أد أيه من الشريعة.. دي الشريعة أعظم من كذا ألف مرة ، إمال لو طبقنا كل الشريعة هيحصل إيه؟! لو طبقنا الدين

ماذا تريدون يا علمانيون؟!

طب بصوا بقى يا سلفيين أصل إنتم هتقولولنا الشريعة ومش الشريعة... طب إنتم عاوزين إيه يعني؟! يعني إنتم عاوزين لما الدين يقوم... عاوزنا نخلي أفيشات السينما (Some like it hot)؟! ونخلي الشاب يدخل على ال (سكس شات) على النت عادي جدًا مفيش مشكلة خالص؟! وكل قضيتنا مع مصانع الخمر والقمار إن هم يدفعوا الضرائب؟! إنتم عاوزين كدة ، هو ده الدين اللي عندكم؟! هو ده اللي يرضيكم عنا؟! مش هنرضيكم ، مش هنرضيكم لأننا مش هنرضي غير ربنا ، لأن السلفيين دول طلاب آخرة ، طلاب آخرة ، يريدون ما عند الله ، إنتم بتقولوا علينا بتوع حكم! بتوع حكم فين؟! إحنا دعاة وهنفضل دعاة ، ولن نترك الدعوة إلى الله أبدًا ، والله لا نريد إلا أن نكون تحت أقدام أي حاكم يحكم بشرع الله

من شبهات العلمانية : الإسلام والنصارى

طب تعالى قبل ما تقعد تخطب لنا وتقول لنا الكلام ده... هتعملوا إيه في النصارى؟! هنعمل معاهم اللي بقالنا ١٤٠٠ سنة بنعمله معاهم ، البابا قبل ما الإسلام يبجي حرقوه حي بالشموع ، فيه قساوسة هربوا ١٥ سنة في الصحاري والجبال ، لما الإسلام جه مسك النصارى أكبر مراكز في مصر كلها ٢٥ ضريبة اضطهاد ديني ... كانوا بيحرقوهم ، سموا العصر اللي قبل الإسلام عصر الشهداء ، ولما جه الإسلام ٩٥% منهم دخلوا في الإسلام ، ليه؟! اللي كانوا بيتحرقوا أحياء وثابتين على مذهبهم ، مش عاوزين يخرجوا من مذهب لمذهب ، ده الإثنين كانوا نصارى اللي بيحكموا واللي بيتحكموا ، يدخلوا الإسلام! يقولك : أصله بسبب الجزية! يا سلام اللي اتحرقوا أحياء علشان ميغروش مذهبهم يغيروا دينهم بكل بساطة كدة؟! إلا علشان نور الإسلام

من شبهات العلمانية : الإسلام والاقتصاد

طب هتعملوا إيه مع البنوك بقى؟! يبصلك كدة وبعدل هدومه كدة كانه إداك الضربة القاضية... ده البنوك بالنظام ده هي اللي خربت البلد ، أمريكا يا جماعة نسبة الفائدة في بنوكها تصل إلى صفر ، ليه؟! يقول لك : ما هو لو كل واحد حطنا فلوسه في البنك يبقى البلد خربت ، ليه؟! لأن محدش هيشغل فلوسه ، خلاص هيبقى فيه بطالة ، أنا كنت هفتح بالميت ألف جنية اللي معايا محل ملابس ، هشغل ٢٠ واحد يبلطوا ويمحروا ، وأشغل ٥ وظيفة دائمة ، فمصانع الملابس هتشتغل بسبي ، والعربات اللي بتنقل البضاعة هتشتغل بسبي

أنا دلوقت حطيت الفلوس في البنك علشان الـ ١٠% اللي هيجولي من وراهم ، خلاص كل دول مش هيشغلوا ، دي البطالة ! طب والبنوك عملت إيه ؟! قامت راحت حطت معظم فلوسها في بنوك بره ، يا نهار أبيض ! بره خدوا فلوسنا ، طوروا بيها اختراعاتهم ، وطوروا بيها علمهم ، وطوروا بيها بلادهم ، واخترعوا اختراعات رجعوها لنا - رجعوا لنا الاختراعات مش العلم - وسلفونا فلوس نشترى بيها اختراعاتهم ، فتخلص الفلوس ، ودينونا ، وخدوا فلوسنا ، وإحنا معانا شوية اختراعات كذا سنة وهتبوظ ، دي البنوك يا جماعة !

طب هتعملوا فيها إيه ؟! هتبقى بنوك إسلامية ، يعني هنعمل فيها إيه يعني ؟! الموضوع ما هو إلا إن الورقة بتاعت الحسابات هتغير النظام بتاعها بس ، مش أكثر ، هتبقى تشغيل أموال... زائد الاقتصاد الإسلامي يا إخوانا محمد يونس في بنجلادش خد نوبل للسلام بسبب مشروع اسمه بنك الفقراء ، بنك الفقراء ده إدوله نوبل من انبهارهم من الأثر اللي هو عمله ، بنك الفقراء ده فكرة من أفكار بيت المال الإسلامي ، ولكن مسمهوش بيت مال ، سماه بنك الفقراء ، إدوله نوبل وهم مش عارفين أنهم بيدوا نوبل لفكرة صغيرة من أفكار الشريعة الإسلامية يا جماعة لو زكاة الزروع بس ، اللي هي الزكاة اللي على الأقوات ، اللي بنسبها شنطة رمضان ، الزكاة اللي على الحاجات اللي هي بتبقى بالنسبة للناس قوت ، لو زكاة الزروع بس طبقت ، مش زكاة المال ولا زكاة عروض التجارة ولا زكاة المواشي ، زكاة الزروع بس مش هتحتاج وزارة تموين أصلاً في البلد ، ليه ؟!

كل فقير هيقى في بيته الخزين بتاع السنة كلها ، لأن الزكاة في الشرع أنك تدي للفقير قوت السنة ، الناس بتدي للفقير ده خمسين جنيه وده سبعين جنيه من الزكاة ، الكلام ده مش ده الشرع ، الشرع إنك تديله كفالة سنة ، كفالة سنة كاملة علشان ميمدش إيداه طول السنة

ويجي يقولك : هتعملوا إيه في الاقتصاد ؟! إنجلترا فيها ١٢٢ معهد تدريس للإقتصاد الإسلامي ، ٣٧٠ مصرف إسلامي ، يبقى بره مطبقين اقتصادنا ! ولما حصلت الأزمة الاقتصادية العالمية المصارف الإسلامية هي اللي ما أتهزتش ومتأثرتش ، إحنا يا جماعة أعظم اقتصاد... طب يا عم خلاص انتهى الاقتصاد

من شبهات العلمانية : الإسلام والسياحة

طب هتعملوا إيه في السياحة ؟! هااه السؤال اللي أنتوا دايماً بتهربوا منه.. سياحة إيه ؟! أنا اللي عاوز السياح ، أنا المسلم اللي فاهم ديني اللي عاوز السياح ، ده أنا لو مجوليش أنا هدف مالاين علشان أروح لهم أعرفهم شريعة ربنا ، لكن فرقوا بقى ما بين سياحة وسياحة ! ماهوا السياحة بمعنى إيه ؟! إنهم جاين يشوفوا تاريخ البلد وحضارة ١٤٠٠ سنة وتاريخ مصر ؟! ماشي دي سياحة ، إنما سياحة بمعنى سياحة جنسية ؟! اللي إنتم عارفين كويس بيحصل فيها إيه ، سياحة بمعنى إنهم ييجوا يزونا على الشواطئ بتاعتنا ! دي السياحة بتاعتكم بقى ! هو فلوس وخلاص ! طب ما نغسل أموال وخلاص ، وهنكسب أكثر من مليون سياحة !

يا إخوانا الغردقة عايمة على بحر بتروল ، الغردقة اللي دلوقتي مفيش فيها ألف سايح على بعضه ، عايمة على بحر بتروল ، مين اللي أريح ؟! الفلوس بتاعت اللي جاين يعملوا سياحة جنسية والا فلوس البترول ؟! طب ليه لمصلحة مين ؟! لمصلحة مين في اقتصاد البلد والشباب الضايغ والبنات اللي نفسها تتجوز ، والمصالح المعطلة إن بحر البترول ده كله محدش يتكلم عنه ؟! لمصلحة مين ؟!

يا إخوانا إحنا عاوزين نتكلم كلام حقيقي ، كلام يزق البلد لقدام فعلاً... هتعملوا إيه في السياحة ؟! في الهند ، محدش يدخل الهند إلا لما يقولوله : قواعدنا وتقاليدها لازم تحترمها ، لكن يبجي بدولاته ويدوس على رقابنا ! لأ طبعاً لينا قواعد ولينا تقاليد

بعد كدة أنا اللي عاوزك... أنا اللي عاوزك يا سائح ، أقولك إيه ؟! رؤساء الدولة وزرائنا يستقبلوك في المطار علشان نعرفك أخلاق ديننا هي إيه ، علشان يعرفوا إيه هو الإسلام ، مش يبجوا !!! عارفين أنتوا قصة السياحة في مصر !

من شبهات العلمانية : الإسلام والصوفية

طب هتعملوا إيه في الصوفية بقى ؟! أيوة يا سيدي المقامات والأضرحة هتولعوا فيها فوراً ؟! دي بقالها ألف سنة مولعناش فيها ليه ؟! ما أيام الثورة مكش حد داري بحاجه ، مولعناش فيها ليه ؟!

عارفين "إحنا دافينه سوا" .. قصة حقيقية ، يقال إنها حقيقية ، اتنين ماشيين في صحراء ، فالحمار مات ، فدفنوا الحمار وقعدوا يعيطوا ، الحمار مات هيروحوا إزاي وهيعملوا إيه ، فمعدى ناس من قافلة فلقوهم قاعدين على القبر بيعيطوا ، قالوا : بس ده ولي ، قاموا الناس نازلين قعدوا يتبركوا بالولي ، ويدفعوا فلوس علشان الولي ، فالأتنين بصوا إيه ده ، لا لا ده الموضوع ده بييجيب فلوس ، قاموا عاملينه مقام وعاملين صندوق نذور ، وبقوا هما أمناء الصندوق ، وبقت الناس تيجي وتدفع للولي ، في يوم من الأيام اتشاكلوا مع بعض على تقسيم الفلوس ، فواحد قال للثاني : لا لا وحية سيدنا الولي ! قاله : لا يا عم ده "إحنا دفينه سوا" ! ... أنت جى تقولي "سيدنا الولي" مش عليا الكلام ده !

يقولك: هيهدوا مقام سيدنا الحسين... يا سلام والناس بتعيط يا عيني ، يا جماعة الحسين لم يطأ بقدمه أرض مصر في يوم من الأيام أصلاً ، الحسين أصلاً قتل في العراق يا أخواني ، قتل في العراق.. طب يقولوا قبره هنا ليه ؟! ده يقولك : إن الحسين رضي الله عنه لما ذبح ، راسه طارت من العراق لمصر - يا سلام ! - فهو راسه جت المقام بتاع سيدنا الحسين ، سيدنا الحسين له أربع أو خمس مقامات في العالم ، مين فيهم فيه سيدنا الحسين ؟! هنعمل إيه مع الصوفيه ؟! نعمل معاهم إيه ؟! ما بقالها ألف سنة... هنعرف الناس يعني أيه توحيد ، هنعرف الناس يعني أيه توحيد ، يعني إيه لا يجتمع قبر ومسجد في دين الله ، هنعرف الناس التوحيد ، هنعرف اللي في قلوب الناس

لا صلاح إلا بالشرعية الإسلامية

طب هتعملوا إيه بقى ؟! هتعملوا إيه ؟! يا إخوانا دي شريعة ربنا... شريعة ربنا... البلد بتاعتنا اتأخرت أد إيه ، مصر فين دلوقتي يا إخوانا ؟! مصر دلوقتي اقتصادياً في ذيل العالم ! اجتماعياً أعلى نسبة طلاق في العالم كله ، مصر أعلى نسبة طلاق ! عندنا ١٦ مليون عانس ومطلقة ، والله قسمًا بالله المشاكل دي ما ليها حل غير الشريعة الإسلامية ، الدكتور اللي بيكتب رويته ، بيكتب لك كالكسيوم لمراتك بخمسين جنيه ، علشان شركة الأدوية تطلعوا رحلة لتركيا ، والكالكسيوم له بديل بثلاثة جنيه ، حل ضميره إيه ؟! حل ضميره إيه غير الشريعة الإسلامية ؟! المجتمع ده مش هيتصلح غير بالشرعية ، مفيش حاجة هتتقذ المجتمع ده غيرها

أهل السماء وإجلال الشريعة

تعالوا ياللي بتحاربوا الشريعة ، تعالوا شوفوا الشريعة الإسلامية دي وهي نازلة من السما حصل إيه ، تعالوا شوفوا والشريعة نازلة من السماوات حصل إيه ؟! تعالوا شوفوا الملائكة أهل السماوات عملولها إيه ؟! يا اللي أنتوا دلوقتي بتقولوا : لأ يا رب اقنعني ! أنا هاخذ اللي يعجبني واسيب اللي ميعجبنيش ! آه دي تنفع ! دي متنفعش ! دي آه دي لأ ! ايوه يا رب ... لأ يا رب ! أنت بتعبد مصلحتك كدة ، مش بتعبد ربنا سبحانه وتعالى

طب "الشريعة" وهي نازلة ، شوف حديث النبي صلى الله عليه وسلم: "إذا تكلم الله بالوحي سمع أهل السماء الدنيا صلصلة كجر السلسلة على الصفا ، فيصعقون ، فلا يزالون كذلك حتى يأتيهم جبريل ، حتى إذا جاءهم جبريل ، فزع عن قلوبهم ، فيقولون: يا جبريل ماذا قال ربك ؟ فيقول: الحق ، فيقولون: الحق الحق" صححه الألباني ربنا هينزل آية ، الآيه دي ممكن تكون آية الحجاب ، ممكن تكون آية اربا ، ممكن تكون تشريع اجتماعي ، ممكن تكون تشريع اقتصادي ، ممكن تكون تشريع في تحرير العبيد يا إخوانا ، الشريعة نازلة أهو ، شوفوا السماوات هيحصل فيها إيه ، شوف السما هيحصل فيها إيه مع نزول الشريعة "إذا تكلم الله بالوحي سمع أهل السماء الدنيا صلصلة كجر السلسلة على الصفا ، فيصعقون" أهل السماء يسمعو صوت رهيب ، سبحان الله العظيم ، أهل السما يسمعو صوت فيصعقون ، يحصل صعق جماعي في السماوات السبعة ، من تعظيمهم للأمر "فلا يزالون كذلك حتى يأتيهم جبريل" جبريل نازل بآية من آيات الشريعة ، ممكن تكون آية الربا "حتى إذا جاءهم جبريل ، فزع عن قلوبهم ، فيقولون: يا جبريل ماذا قال ربك ؟ فيقول: الحق ، فيقولون: الحق الحق" ... السماوات السبع بتصعق من شدة هيبة جلال الله والشريعة نازلة ، هنا يقولك اقنعني ! اقنعني ؟!

العلمانية ورفض الدولة الدينية

يقولك طب بص بقى يا عم الشيخ ، بصراحة كدة إحنا زعلانين منك علشان إنتم بتتوع حكم ، بصراحة بقى ، إنتم بتتوع حكم ، وعاوزين تحكموا ، وعاوزين دولة دينية في القرن الواحد والعشرين ، يا عم عاوزين نلحق العالم بقى ، طب بص بس على يمينك كدة قبل ما تتكلم ، أهو إسرائيل جنبنا أهو ، دولة دينية ، واسمها ديني ، وعلمها ديني ، وشعاراتها دينية ، اشمعنى متكسفوش من دينهم ؟! وإحنا مكسوفين من ديننا دوناً عن العالم كله ؟! اسم الحزب اللي بيعحكم ألمانيا إيه ! الأحزاب اللي إسمها كدة "الحزب المسيحي" المسيحي ! في أوروبا شكلها إيه ؟! تعالى شوف دساتير أوروبا ياللي رافضين المادة الثانية من الدستور ، وبتقولوا إن المادة الثانية دي هتفرق الأمة ، دستور انجلترا رائدة العلمانية في العالم ، دستور إنجلترا بينص إن "ممنوع حد يدخل رئاسة الدولة - اللي هو رئيس الوزراء - ممنوع حد يدخل مجلس اللوردات - اللي هو زعي مجلس الشعب - إلا بروتستانتى" ، بروتستانتى يعني مش كاثوليكي ! مش بتتوع الفاتيكان ، ومش كدة ! دول أوروبية تانية دساتيرها بتقول: "ممنوع حد بروتستانتى يمسك أي حاجه في الحكم" الكاثوليك بس اللي يمسكوا ! ده كلام في دساتيرهم يا إخوانا ، كل دولة بتحافظ على هويتها ، إحنا ليه متخليين عن هويتنا !! هويتنا أو الهاوية !

الناس فاكدة إن "الدولة الإسلامية" معناها إن الشيخ فلان هيبقى وزير الاقتصاد ، والشيخ فلان هيبقى وزير السياحة ، والشيخ فلان هيبقى رئيس الجمهورية ! ده جماعة ده كلام وهمي يا إخوانا ، الإسلام أكثر دين بيحترم التخصص ، الإسلام أكثر دين بيحترم التخصص ، اللي هيمسك الاقتصاد من الاقتصاديين ، اللي هيمسك السياسة سياسيين ، ولكن بشريعة ربنا... بشريعة ربنا

لسنا طلاب حكم

الدولة الدينية يا إخوانا ، والله إحنا ما طلاب حكم ، والله ما عاوزين حكم ، ولا لينا في حكم ، إحنا دعاة ، وهنفضل دعاة إن شاء الله... يا إخوانا ما لسه شافين آية من آيات ربنا ، ما هو كان ماسك البلد ، كانت الكلمة منه ألف كيلوا في ألف كيلوا ، دلوقتي فين يا جماعة ؟! الناس قاعدة تتشاكل دلوقتي على الوزارة ، وعلى الانتخابات ، وعلى مجلس الشعب ، وعلى مين هيبقى رئيس الجمهورية ، وخمسين واحد بيتشاكلوا على الرئاسة ، لهم عبرة في الملك اللي نزع قدام عيننا من أيام !

مهياش باقية ! والله العبرة اللي حصلت دي ما فيش عبرة أشد منها على وجه الأرض إلا الموت ، حكم إيه اللي إحنا ماسكين فيه ، إحنا طلاب آخرة ، إحنا كل قضية حياتنا كلمة : "نعم العبد" الكلمة اللي الصحابة المبشرة بالجنة فضلت تشتغل في العمل الصالح عشانها ، علشان رضى ربنا سبحانه وتعالى... علشان رضى الله

كلمة إلى السلفيين : "نحن طلاب آخرة"

إحنا طلاب ما عند الله ، أنا بكلم دلوقتي السلفيين ، كل خمسين أخ رايحين يعملوا حزب سياسي ، إنتم مالكو ! أما المشايخ تعمل حزب سياسي ده "فكر" ، هم عارفين هيعملوا إيه ، وعارفين إزاي هيجمعوا ما بين الدعوة وما بين هذا الأمر ، إنما الأخوة اللي كل خمسين أخ رايحين يعملوا حزب سياسي ، إنت مالك ! إنت مالك ! ما الدنيا مفتوحه أهو

كنت بقرأ في قول الله : "الم * غَلَبَتِ الرُّومُ" الروم ١: ٢ قلت : سبحان الله ، دي نشرة أخبار عالمية يا رب ، يا رب دي الأخبار العالمية المفروض تيجي في قناة الجزيرة مش تيجي !... لأ... "غَلَبَتِ الرُّومُ" ما دام همك إصلاح العالم لازم تعرف أخبار العالم ، بس خد بالك ، مش معنى كدة إنك تسيب طريقك ، سورة الروم اللي نازلة أيام الحرب العالمية الكبرى ، الحرب العالمية بين الفرس والروم ، سورة الروم كلها بتتكلم عن آية ؟! سورة الروم بتتكلم عن الله والدعوة إلى الله ، يعني وسط الحرب العالمية محدش اتشغل عن الدعوة يا أخواني ، علشان كدة آخر آية في نفس السورة... آخر آية "فَاصْبِرْ إِنَّ وَعْدَ اللَّهِ حَقٌّ وَلَا يَسْتَخِفُّكَ الَّذِينَ لَا يُوقِنُونَ" الروم: ٦٠

"وَلَا يَسْتَخِفُّكَ" اوعى تستخف ! اوعى تغير خط سيرك ، اوعوا يا شباب ، اوعوا يا أخوة ، اوعوا يا أخوات.. إحنا بتوع دعوة إلى الله ، لما بنقول في الانتخابات رأينا بنقولها لأننا مواطنين ، مواطنين لينا رأي برضه ، إحنا يعني اللي جت علينا يعني ؟! لينا رأي ، ومعانا نبراس بنور للناس طريقها ، وبنعرفهم الصبح من الغلط ، والناس تستجيب أو لا تستجيب ، إحنا ملناش سلطان على حد ، منقدرش نجبر حد على حاجة

الحاكم الصالح جائزة من الله للشعب الصالح

"غَلِبَتِ الرُّومُ * فِي أَدْنَى الْأَرْضِ وَهُمْ مِنْ بَعْدِ غَلِبِهِمْ سَيَغْلِبُونَ" الروم ٢: ٣ ربنا يقول الأمر كله بإيده ، إنتم فاكرونا إن رئيس الدولة الجاية ده بالأصوات ؟! والله الحاكم الصالح جائزة من الله للشعب الصالح ، والله لو موتنا نفسنا علشان نجيب حاكم صالح ، ما هيبجي غير لو إحنا نستاهله ، يا جماعة دي سنن من عند بنا سبحانه وتعالى .. سنن ، الصحابة عرفوا الدنيا بيحصل فيها إيه ، ولم يشغلوا إلا بالدعوة إلى الله ، يا إخوانا يا أخواتنا... يا الشباب الملتزم على الفيسبوك ، الحرب اللي قائمة على الدين دي ! ألا تجيبوه ؟!

زي ما الرسول صلى الله عليه وسلم قال بعد غزوة أحد ، لما طلع على الجبل ، ففي الحديث يروي البراء بن عازب: "لقينا المشركين يومئذ ، وأجلس النبي صلى الله عليه وسلم جيشاً من الرماة ، وأمر عليهم عبد الله ، وقال : **"لا تبرحوا ، إن رأيتمونا ظهرنا عليهم فلا تبرحوا ، وإن رأيتموهم ظهوروا علينا فلا تعينونا"** ، فلما لقيناهم هربوا حتى رأيت النساء يشتددن في الجبل ، رفعن عن سوقهن ، قد بدت خلاخلهن ، فأخذوا يقولون : الغنيمة الغنيمة ، فقال عبد الله: عهد إلى النبي صلى الله عليه وسلم أن لا تبرحوا ، فأبوا ، فلما أبوا صرفت وجوههم ، فأصيب سبعون قتيلاً ، وأشرف أبو سفيان فقال: أفي القوم محمد ؟ فقال: **"لا تجيبوه"** ، فقال: أفي القوم ابن أبي قحافة ؟ قال: **"لا تجيبوه"** ، فقال: أفي القوم ابن الخطاب ؟ فقال: إن هؤلاء قتلوا ، فلو كانوا أحياء لأجابوا ، فلم يملك عمر نفسه ، فقال: **"كذبت يا عدو الله ، أبقى الله عليك ما يخزيك"** ، قال أبو سفيان : اعل هبل ، فقال النبي صلى الله عليه وسلم: **"أجيبوه"** قالوا: ما نقول ؟ قال: **"قولوا : الله أعلى وأجل"** ، قال أبو سفيان: لنا العزى ولا عزى لكم ، قال النبي صلى الله عليه وسلم: **"أجيبوه"** ، قالوا: ما نقول ؟ قال: **"قولوا: الله مولانا ولا مولى لكم"** قال أبو سفيان: يوم بيوم بدر ، والحرب سجال ، وتجدون مثله ، لم آمر بها ولم تسؤني " رواه البخاري

أبو سفيان وقف تحت يقول: أفي القوم محمد ؟ أفي القوم ابن أبي قحافة ؟ أفي القوم ابن الخطاب ؟ قال الرسول صلى الله عليه وسلم: **"لا تجيبوه"** الرسول صلى الله عليه وسلم يقولهم محدش يتكلم ، دي قضية أشخاص... لما قال أبو سفيان : "اعل هبل" النبي صلى الله عليه وسلم قال لهم: **"أجيبوه!"** أنتوا سامعين ربنا بيشتم وساكتين ! يا رسول الله المعركة ممكن تقوم تاني ؟! تقوم بس ربنا لا يُسب وإنتم ساكتين

فتح من الله

إخوانا اللي على الفيس بوك ، إخوانا اللي على التويتر ، إخوانا اللي في الجامعات ، إخوانا إحنا معملناش أسر في الجامعات علشان نمسك اتحاد طلبة ، إحنا عملنا أسر علشان نخدم الناس ، وندعوا الناس ، إحنا عاوزين يا جماعة ندعوا الناس الأبواب مفتوحة ، إحنا عاملين زي صلح الحديبية دلوقتي ، لأول مرة معدش ممنوع إن إحنا نتحرك ، الصبح ندوة بفضل ومنة الله في جامعة ، بعدها ندوة في جامعة ، بعدها مؤتمر في بلد ، بعدها مؤتمر في بلد ، ممكن بعدها ندوة في نادي من النوادي ... إيه الفتح ده يا رب ؟! إيه الفتح ده ، الواحد والله يا أخواني ما هو لاقى وقت ، يعني ما شاء الله بفضل الله أكثر من ٧٠ كلية عاوزين مواعيد... يا إخوانا عاوزين نستغل هذا الفتح ، أنت جاي دلوقتي تشغلي بالأحداث وتضيعوا الفرصة العظيمة لإنقاذ الشباب من القواقع اللي هما فيه !

"على فين يا مصر" سلسلة للشباب

السلسلة دي ياذن الله سبحانه وتعالى هيكون للشباب فيها أكبر موقع ، هيكون لإنقاذ الشباب وللدعوة وللوعظ ، وبقولها وبكررها : "وللوعظ" ... أكبر موقع ، الناس قلوبها صدت ، من كتر ما إحنا نفسنا مبتكلمش غير في نعم ولأ... والله لولا هذه الشبهات اللي خلاص تكاثرت على دين الله ، ما كان الواحد وفر درس زي ده واتكلم عن معصية من المعاصي اللي بيعصى بيها ليل نهار ، واتكلم عن حاجة تقرب الناس لربنا ، ولكن الحرب على أشدها مينفعش ، مينفعش نسلخ من الواقع ، هنتكلم في الدعوة وهنتكلم في الوعظ ، وهنتكلم الشباب وهننزل للشباب إن شاء الله... حتى في قهاويهم ، حتى في مولاتهم ، حتى في كلياتهم ، حتى في نواديهم

الدعوة والواقع

ولكن في نفس الوقت... في نفس الوقت لازم نفهم إننا لازم نكون فاهمين الواقع كويس جدًا وإحنا بندعوا إلى الله ، فاهمين الواقع ، منزلش لشاب عنده ٢٧ سنة قاعد على القهوة محطم كان بيعحب بنت وسابته ، أول ما جالها عريس غني هي وأهلها سابوه ، وقلبه محطم ، وقاعد معاصي الشهوة معاصي السر قتلاه ، وواقع فريسة للمواقع القدرة ، وقاعد على القهوة هيموت علشان يتجوز ومعهوش فلوس ، نفسه في وظيفة ومش لاقى وظيفة ، أنا نازل أكلم شاب زي ده في الدين ، لو أنا مش فاهم همومه والله ما هيسمعني

علشان كده أنا بقول لكم إن الدعوة لا تفصل عن فهم الواقع ، ربنا يقول "غَلَبَتِ الرُّومُ" الروم: ٢ يعني افهموا الواقع ، افهموا الواقع ماشي إزاي ، وافهموا الدنيا بيحصل فيها إيه ، ولكن بتفهموا علشان تبقوا عارفين بتدعوا إزاي ، عارفين "لَقَدْ جَاءَكُمْ رَسُولٌ مِنْ أَنْفُسِكُمْ" التوبة: ١٢٨ أول صفه أنه واحد من الناس ، من بين الناس ، عايش آلامهم وعايش همومهم ، عارف الناس بتفكر في إيه "وَمَا أَرْسَلْنَا قَبْلَكَ مِنَ الْمُرْسَلِينَ إِلَّا إِنَّهُمْ لَيَأْكُلُونَ الطَّعَامَ وَيَمْشُونَ فِي الْأَسْوَاقِ" الفرقان: ٢٠ يعني بيعيشوا وسط الناس ، مفيش داعية منزلش للناس ، مينفعش ، مينفعش يا إخوانا ، لازم يا شباب تنزلوا للناس

يا إخوانا التيار السلفي فعلاً عايز نقلة بقي ، أنا لما بركب عربية شوية بجيب الأول ، شوية بجيب الثاني ، شوية بجيب الثالث ، يا إخوانا عاوزين نقل ، السنوات اللي فاتت كانت الناس مش عارفين يعني إيه سلفية ، خلاص قعدنا نتكلم يعني إيه سلفية ، وشيوخنا اتكلموا يعني إيه سلفية ، لحد ما كلنا عرفنا يعني إيه سلفية ، يعني إيه المنهج ، إيه السنة ، يعني إيه عدم الانفصال عن الجذور

السلفية... كله بدليل

يا خوانا أصله يقولك: إيه السلفية دي؟! السلفية! سبحان الله العظيم ، لما فرنسيس بيكون عمل المنهج التجريبي ، يا نهار ابيض ، الدنيا اتقلبت بره ، عمل المنهج التجريبي والعلم بقي له طريق! إيه المنهج العلمي اللي عمله فرنسيس بيكون ده؟! في أيام الثورة الفرنسية ، قال: "محدث يتكلم إلا بدليل" ، أرسطوا بقي يقعد يفكر في السما ، سقراط يقعد يفكر في الطب... الكلام ده كله ولا له قيمة ، اللي مش هيجيب دليل ميتكلمش... يعني إيه؟! يعني المنهج العلمي اللي في الدنيا كله اتقلب بره لما قالوا: "محدث يتكلم إلا بدليل"

طب ما دي "السلفية" إن محدش يتكلم إلا بدليل ، محدش يقول حاجة إلا بدليل ، هي دي السلفية ، هي دي إن مش أي حد ينفع يتكلم في الفرياء ... لأ ، أي حد يتكلم في الكمياء ؟ لأ ، أي حد يتكلم في الطب ؟ لأ ... إمال أي حد يتكلم في الدين ليه ؟! ليه يا إخوانا ؟!

لماذا يكرهون الشريعة ؟!

لماذا يكرهون شرع الله ؟! الناس بتكره شرع ربنا ليه ؟! ليه الناس بتكره شرع ربنا ؟! كان في واحدة اتصلت بأحد إخوانا ، فبتقول له : أنا كرهت الطلاق ، قال لها : استغفر الله العظيم وأتوب إليه ، دي كلمة صعبة ، يعني كرهتي الطلاق ليه ؟! قالت له : أنا جوزي طلقني ، قال لها : طب وإيه يعني فيه ٣ طلاقات ، قالت له : ما دي الثالثة ، قال لها : طب نشوف الصيغ ، قالت له : الثالثة عند المأذون ! إيه ده هو المأذون تحت بيتكم رايحين جايين ! قالت له : فبعد كدة معدتش طايقه الطلاق بقى ، اتجوز ثلاثة ، والثلاثة كل واحد يطلقني ثلاث طلاقات ، الثلاث طلاقات عند المأذون ، قال لها : حضرتك بقى ، المشكلة واضح إن هي مش في الطلاق يعني ، المشكلة مش في الطلاق ، المشكلة فيكي أنتي بقى يعني ... آدي واحدة بتكره الطلاق ، تكره الطلاق! لماذا يكرهون الإسلام ؟! لماذا يكرهون الشريعة ؟!

القضية مش "ما اقتنعوا بيه" !

يا إخوانا اوعوا تكونوا مصدقين فكرة "عم المقتنع" اللي مش مقتنع بالشريعة ، مش مقتنع بإيه ؟! مش مقتنع بالنور ، مش مقتنع بأعظم جوهره على وجه الأرض كلها ، مش مقتنع إزاي ؟! لا ده ربنا قالها في كلمتين : **"وَاتَّبَعَ الَّذِينَ ظَلَمُوا مَا أُتْرِفُوا فِيهِ وَكَانُوا مُجْرِمِينَ"** هود: ١١٦ ده القضية مش "ما اقتنعوا بيه" ... لا ... **"مَا أُتْرِفُوا فِيهِ"** القضية قضية إن ده بقى على مزاجه !

زي واحد ماشي حوالين الكعبة ، لقى واحد رفع إيده : اللهم ارزقني مودة مثل مودة شبرمة ، اللهم ارزقني مودة مثل مودة شبرمة ؟! إيه يا عم مين شبرمة ده ؟! قال له : شبرمة ! وما أدراك ما شبرمة ، شبرمة أكل مليًا - كل أكلة من اللي نفسك فيها خروف بقى والا حاجة - وشرب هنيا - وقام شارب العصاير اللي نفسه فيها ومحلي - ثم نام في الشمس فمات ، يعني شبرمة اللي منتهى أمله يموت زيه .. واحد كان أكل حاجة حلوة ، وشرب شربة حلوة ، وقام نايم متشمس كدة قام نازل له ملك الموت فمات ! ده اللي أحلامه إنه ياكل أكلة حلوة ويلبس لبسة حلوة .. ده لما تكلمه عن فلسطين ، فلسطين مين ! تضحية مين ! أضحي ليه ؟! أضحي ليه ؟!

لماذا يكرهون الشريعة ؟! لازم نقف يا إخوانا ونعرف ، اللي قال لك : " لو الديمقراطية تجيب الأخوان ، تولع الديمقراطية " ، واللي قال لك : " لو الديمقراطية تجيب الإسلام تحتط بين قوسين " ، واللي قال لي : " لو الحرية هتجيب الإسلام مش عايزين الحرية " لماذا يكرهون الشريعة ؟! لأنه هو حقيقةً أساسًا مباده بيكفر بيها ، مش بيقول حرية وديمقراطية ! كفر بالحرية وكفر بالديمقراطية لما هتجيب حاجه هتقيد شهواته ! يا إخوانا الناس مش عايزة حاجه تقيد شهواتها !

الإسلام والدعوة للعمل والانتاج

الدين ده بيدعوا للعمل ، بيدعوا للانتاج ، بيدعوا إن الواحد يشتغل... طب "التنبل" بقى ؟! الإسلام يحارب "التنبلة" ، ويحارب "التنابلة"... يبجي واحد يقول لك : يا عم هيقولوا لنا عمروا الصحراء ، وهيقولوا لنا الجهاد في سبيل الله... الإسلام يحارب "التنابلة"

يعني واحد تنبل قاعد في بيته ، فمراته خرجت تجيب الأكل من بره ، وأولاده تنابلة زيه ، فرجعت فبتخبط يا عيني ، قوم يا وله افتح لوالدتك ، قاله: أنا قادر ؟! مش قادر اتحرك... قوم يا ابني أنت جنب الباب ، قاله : هي كانت مراتي أنا ، دي مراتك أنت ، قوم افتح لها أنت ! سايب مراته قاعده تخبط يا عيني ، تعبانة افتحوا لي.. فبعد كدة قال لها : أنا لسه هقوم واتحرك واروح للباب ، روعي وأنت طالق ! ياللا... في ناس مش عاوزة تتحرك يا إخوانا في ناس مش عاوزة تعمل حاجه ! إحنا عاوزين نشغل

على فين يا مصر ؟!

خط سيرنا فين ؟! خط سيركم يا شباب فين ؟! خط سيرنا يا شباب إن إحنا خلاص عارفين شريعة ربنا ؟! وعارفين دين ربنا ؟! اللي يجي يقولك : الشريعة الإسلامية آه ما هي مطبقة ! يا ولد ! أي والله ده ٩٩% من الشريعة مطبقة ! فين الكلام دا ؟! مطبقة ! ٩٩% منها ، إنتم عاوزين ايه ؟! مطبقة ؟!

يعني كان خبر في جريدة من الجرائد يقول لك: تم القبض على تاجر خمور - الله أكبر إيه ده بقى ؟! دين ده والا إيه ؟! - لأنه يغش في الخمور ! يا نهار أبيض ! عاوزين "إن الله تعالى يحب إذا عمل أحدكم عملاً أن يتقنه" حسنه الألباني عاوزين اتقان ! كدة يبقى الشريعة مطبقة !

التوصيات

وصلنا دلوقتي للخاتمة بتاعت الدرس ، التوصيات بتاعت الدرس... خط السير ، مقدمة القافلة بتاعت الدرس ، يا إخوانا الحرب على الإسلام دلوقتي على أشدها ، الإسلامفويا مالية العالم ، السلفويا بقت مالية مصر دلوقتي ، الناس قاعدة خايفة منّا ، خايفة من السلفيين ، خايفة من اللي بينادوا بالإسلام ، بيعجبوا دين ربنا بس اتخوفوا ، اتخوفوا بمية النار وبقطاعات الودان ! اتخوفم يا جماعة !

عاوزين نفهم الناس ، عاوزين ننزل للناس ، عاوزين ننتقل للناس.. علشان كدة إحنا عملنا مشروع مهم جدًا وخطير جدًا ، وبإذن الله سبحانه وتعالى يبقى فتح في مصر كلها على الشباب ، وبإذن الله هيبقى ده بداية تواصلنا مع الشباب ، عاوزين نتواصل مع الشباب ، أنا عملت صفحة الفيسبوك ، اللي ممكن تكون ظهرت على الشاشة اثناء الحلقة :

www.facebook.com/drhazemshouman

عملنا صفحة على الفيس بوك علشان نتواصل مع الناس ومع الشباب ومع أي حد عاوز يتواصل من خلال هذه الصفحة... ولكن يا جماعة ، إحنا عاوزينكم كلكم... في كل جامعة ، وفي كل نادي ، وفي كل كلية ، وفي كل معهد ، وفي كل منطقة ، وفي كل بلد ... عاوزينكم كلكم توصلوا للناس وتنزلوا للناس

مشروع نشر الهداية

طب الشباب دلوقتي بيقولك : أنا مش عارف دلوقتي أقول أيه ؟! ومش عارف اتكلم ، يعني مشكلتي إني مش عارف آدي للناس إيه واعمل إيه ؟! عملنا مشروع اسمه "مشروع نشر الهداية" إن إحنا نعمل ورق وعطي ، طبعاً إن شاء الله ورق جميل جداً يعني: "زي ورقة الامتحان اتسرب ، زي ورقة الشريعة الإسلامية ، زي زي ... " ، ورق معين ، وسيديهات أقوى سيديهات ، يعني ممكن أنها تأثر في شاب خدناها وسمعها فعلياً

وعملنا المشروع على موقع الطريق إلى الله ، وطبعاً الفيسبوك هيبقى مشترك معاه ، عملنا مشروع "نشر الهداية" إحنا مستعدين نطبع الورق ده ، إحنا مستعدين نطبع السيديهات دي ، وأي حد في أي مكان عايز نسخ من هذه السيديهات ، أي كمية من هذا الورق ، أي كمية من هذه السيديهات ، أي نوع معين من هذا الورق ، وأي نوع سي دي معين ، يبدأ أنه يطلب الكميات اللي هو عاوزها ، وطبعاً هتبقى حاجة بسعر التكلفة مش أكثر اسماء الاسطوانات : "لازم اتغير - قف وتفكر - هاتي أيدك - الامتحان اتسرب !" ورق شبابي جميل ، ولسه ياما هنزل ورق إن شاء الله ، وناوي الفترة الجاية إن شاء الله هنعمل ورق كثير وهنزل سيديهات كثير ، من أجل الوعظ ومن أجل الدعوة إلى الله إن شاء الله

علشان كدة إخواني هوا في رقم تليفون بإذن الله سبحانه وتعالى ، احفظوه بسرعة لأن إحنا جينا لآخر الوقت ، الرقم يا جماعة اللي الشباب يخدوه إن شاء الله ويطلبوا كميات من أي ورقة ومن أي سي دي ، علشان معدش ليك حجة تنشر الهداية في كل مكان ، تنشري الهداية في مكانك ، ننتشر يا جماعة بقى : "٠١٩٧٠٠٩٨٢٨" يا إخوانا الفترة دي هنركز في الدعوة إلى الله... هنركز في الشباب ، البرنامج ده إن شاء الله هيبقى حصرياً لإنقاذ شباب الأمة بإذن الله ، وأول مشروع زي ما قلنا هو مشروع "نشر الهداية" هيبقى مشروع كبير جداً بالرقم الخيري بتاع المواد الدعوية ده اللي بسعر التكلفة.

مشروع "نشر الهداية" مشروع إن إحنا نعاونكم بإذن الله سبحانه وتعالى ، علشان محدش يقول بعد كدة : أنا مش قادر أكلّم الناس ، ومش عارف أوصل للناس... إحنا هنديك المادة اللي أنت تتكلم بيها ، واللي أنت ممكن تقرأها وتوعظ منها ، واللي أنت ممكن توزعها على أصحابك ، بس لو وزعت ورقة أو وزعت سي دي تأخذ عهد على اللي قدامك أنه هيسمعه أو هيشوفه بإذن الله وأنت بتبتسم ابتسامة جميلة ، وأنت بتبتسمي ابتسامة جميلة

عاوزين ننشر الدين يا شباب.. عاوزين ننشر دين ربنا ، الفترة الجاية دي لازم تبقى ثورة دعوية ، خلاص بقى... كفاية نعم ولأ ، وكفاية انتخابات ، وكفاية سياسة ، وكفاية مشاكل ، وكفاية شكل ! خلاص بقى عاوزين نركز في طريقنا "وَلَا يَسْتَحِقُّكَ الَّذِينَ لَا يُوقِنُونَ" الروم: ٦٠ عاوزين منقاش خفاف ، أي حاجه تحودنا عن طريقنا ، عاوزين نكمل تاني ، ونرع تاني ، ونقوم تاني ، ربنا فتح لنا منقلش على نفسنا ، ربنا إيدنا منمنعش عن نفسنا

دلوقتي وظيفتنا ورسالتنا المقدسة إن "كل الشباب ده يلتزموا" كل شباب مصر يتوبوا إلى الله ، كل واحد يشارك في هذا الأمر يا إخوانا ، يشارك لوجه الله ، ممكن ياخذ مثل هذه الأشياء يديها لمكروباصات ، يديها في وسائل مواصلات ، يديها للناس في شغله ، يديها لزملاؤه في الجامعة ، لزميلاتها في الجامعة... في ورق خاص نسائي ، وفي سيديهات خاصة نسائية ، يعني حاجات للأولاد والبنات ، وإن شاء الله بعد كدة حاجات كمان متخصصة للتنبيه من كل نوع من أنواع المعاصي

إن شاء الله بإذن الله نبقى مع بعض فريق واحد ، الدين مش هينتصر لما داعية يقعد يهتف ، والدعاة يبجوا هنا يقعدوا يهتفوا قدام الكاميرا ، والناس تقفل بعد البرنامج وتنام ... لأ ... أنا خلاص شغلي بيتهى عند نهاية الكاميرا ، هروح علشان أبدأ شغلي من جديد ، ليك الأسبوع الجاي ، لكن أنت شغلك بيتدي بنهاية الحلقة ، الحلقة دي بتديك خط سير ، بتديكي خط سير ، علشان تقومي وبقى معاكي مادة بتتحركي بيها في الدنيا ، علشان محدش يبجي بعد كدة ، ويقول أنا مش عارف أعمل إيه ؟!

رقم "نشر الهداية" بإذن الله سبحانه وتعالى: ٠١٩٧٠٠٩٨٢٨

ربنا يشبتكم يا اخواني ربنا يبارك فيكم ، وبنجدد اعتذارنا لأبو الهول ! عن مناخير أبو الهول اللي مختفية ومش عارفين مين السلفي اللي سرقها ! أو مين السلفية اللي كسرتها ! معناش عارفين بصراحة هنعمل إيه يا جماعة... يعني مسلسل مية النار وأبو الهول !

في حتى صفحات على الفيسبوك جميلة جداً... صفحة "أنا سلفي وما بعضش ولا بضرب" ، و صفحة "أنا سلفي ومش هخطف حد النهاردة" ، و صفحة "منتقبة آه معقدة لأ" ، و صفحة "ملتزم وأبتسم" ... يعني في صفحات جميلة جداً على الفيسبوك ، طالعة كلها من باب السخرية على الكلام اللي بيتقال لنا ، اللي لا رد عليه فعلاً إلا السخرية... فعلاً حقيقة ، يعني شباب طب برضه على وشك إنهم يعملوا مسرحية "طُب عندنا المنصورة" ، والاخوة اللي هناك على وشك أنهم يعملوا مسرحية "سلفوبيا" بإذن الله سبحانه وتعالى

ربنا يشبت الجميع ، وبارك في الجميع ، ووفق الجميع ، قوموا يا شباب أنتوا مش قليلين ، لما قمتم غيرتم أكبر نظام دكتاتوري في العالم بفضل الله ، قوموا واعملوا ثورة لدينكم ، زي ما عملتم ثورة للدنيا ، قوموا وغيروا الدنيا ، قوموا وغيروا العالم ، قوموا وانشروا الهداية ، محدش ميقاش له دور في نشر الهداية في هذه الفترة

دعاء

اللهم تب علينا لنتوب ، اللهم تب علينا توبة ترضى بها عنا ، اللهم استخدمنا لنصرة دينك في الأرض ، اللهم اجعلنا من جنودك المخلصين ، اللهم استعملنا ولا تستبدلنا ، اللهم أقمنا على مرادك منا ، اللهم أصلح قلوبنا ، أنر قلوبنا ، أضئ قلوبنا ، اللهم اعنا على ذكرك وشكرك وحسن عبادتك ، أغث إخواننا في غرة اللهم انصر بنا الإسلام وانصرنا بالإسلام ، اللهم اخرج منا دعاة وداعيات ، وعلماء وعالمات ، وعباد وعبادات ، ومجاهدين ومجاهدات ، اللهم أطلق ألسنتنا بالحق ، اللهم استخدمنا في الدعوة إليك يا رب العالمين ، اللهم افتح لنا الأبواب وافتح لنا القلوب ، اللهم ائذن لدينك أن يسود وائذن شرعك أن ينتصر ، برحمتك يا أرحم الراحمين أقول قولتي هذا واستغفر الله لي ولكم ، سبحانه الله وبحمده ، أشهد أن لا إله إلا أنت ، استغفرك وأتوب إليك ، وجزاكم الله خيراً

تم بحمد الله

شاهدوا الدرس للنشر على النت في قسم تفريغ الدروس في [منتديات الطريق إلى الله تفضلوا هنا :](http://forums.way2allah.com/forumdisplay.php?f=36)

<http://forums.way2allah.com/forumdisplay.php?f=36>